

Tingkat pengeluaran pertanian

Langkah pastikan bekalan makanan negara mencukupi, harga berpatutan

SENARIO global masa kini menunjukkan fenomena kenaikan harga bahan makanan, termasuk di Malaysia. Fenomena ini dikaitkan dengan kenaikan harga minyak, bekalan bijirin yang rendah, spekulasi dalam pasaran, persaingan dengan pasaran bioteknologi dan perubahan iklim yang menjejaskan pengeluaran makanan dan biodiversiti global.

Sehubungan itu, soal keselamatan makanan menjadi isu hangat dibincangkan pada peringkat antarabangsa. Bank Dunia meramalkan fenomena ini dijangka berterusan untuk 10 tahun akan datang.

Menteri Pertanian dan Industri Asas Tani, Datuk Seri Noh Omar, berkata dengan senario dalam negara yang mencabar iaitu sumber air dan tanah yang terhad, persaingan untuk tenaga kerja dan corak cuaca tidak menentu, agensi kerajaan berkaitan memikul tugas besar untuk menjamin bekalan makanan cukup pada harga berpatutan kepada rakyat.

"Kita juga berdepan cabaran untuk mencapai matlamat utama Model Baru Ekonomi iaitu melonjakkan negara ke arah status berpendapatan tinggi menjelang 2020. Ini bermakna pendapatan golongan sasaran perlu ditingkatkan dan jurang pendapatan antara bandar dan luar bandar dirapatkan," katanya.

Bagi memastikan sektor agromakanan terus mencapai kadar pertumbuhan yang disasarkan dan sebahagian besar keperluan makanan negara dapat dikeluarkan, Kement-

terian Pertanian dan Industri Asas Tani (MOA) menyusun projek berimpak besar dan projek di bawah Bidang Ekonomi Utama Negara (NKEA) untuk dilaksanakan dalam RMK-10.

Siling yang diluluskan kepada Kementerian dalam tempoh *Rolling Plan* Pertama adalah sebanyak RM1.5 bilion dengan keutamaan diberi untuk menyiapkan projek sambutan selain pelaksanaan projek baru. Dengan jumlah peruntukan yang agak terhad pada tahun ini, perbelanjaan dibuat secara berhemah dan menguntungkan rakyat.

"NKEA Pertanian akan menumpukan kepada pelaksanaan 16 Projek Permulaan (*Entry Point Projects*) dan 11 Peluang Perniagaan (*Business Opportunities*) pertanian bernilai tinggi. Penekanan diberikan kepada subsektor yang mempunyai potensi pertumbuhan yang tinggi iaitu akuakultur, rumput laut, sarang burung walet, pro-

duk herba, buah-buahan dan sayur-sayuran serta produk premium makanan terproses. Selain daripada itu, subsektor padi dan penternakan lembu juga dipilih bagi menjamin sekuriti makanan negara," ujarnya.

Sasaran NKEA adalah meningkatkan pendapatan negara sebanyak RM28.9 bilion iaitu daripada RM20.2 bilion pada 2009 kepada 49.1 bilion pada 2020. Di samping itu, NKEA Pertanian juga akan menyediakan 74,600 peluang pekerjaan yang kebanyakannya diwujudkan di kawasan luar bandar.

Pada 2011, MOA diperuntukkan sebanyak RM821.4 juta untuk melaksanakan projek di bawah NKEA Pertanian.

Pada 2011, sektor pertanian kekal mencatatkan pertumbuhan yang positif pada kadar 5.6 peratus atau RM43.19 bilion, dengan sumbangan nilai ditambah sebanyak 7.3 peratus kepada Keluaran Dalam Negeri Ka-

sar (KDNK). Dalam tempoh sama, sektor agromakanan berkembang pada kadar 5.8 peratus atau RM20.21 bilion, dengan sumbangan nilai ditambah sebanyak 46.8 peratus kepada KDNK sektor pertanian.

Penyumbang tertinggi kepada peningkatan nilai ditambah sektor agromakanan pada 2011 adalah subsektor perikanan dan subsektor tanaman makanan di mana masing-masing menyumbang sebanyak 17.4 peratus. Sumbangan subsektor ternakan pula sebanyak 12 peratus.

Dari segi prestasi perdagangan, jumlah eksport bahan makanan negara pada 2011 bernilai RM20.5 bilion berbanding RM18.1 bilion pada 2010. Ini adalah sumbangan sebanyak 15.3 peratus kepada keseluruhan jumlah eksport sektor pertanian negara. Kenaikan ini didorong oleh kenaikan eksport krustasia dan moluska, margerin dan lemak, kopi, hampas isirung kelapa sawit, susu dan hasil susu, gula tebu dan gula ubi, keluaran roti serta ayam/itik.

Import bahan makanan pada 2011 adalah sebanyak RM34.5 bilion menjadikan defisit imbalan dagangan makanan negara sebanyak RM14.0 bilion. Defisit imbalan makanan ini terhasil daripada pengimportan bahan makanan yang tidak dapat dikeluarkan dalam negara disebabkan keadaan iklim atau kos pengeluaran yang tinggi.

Bagi 2012, MOA mendapat peruntukan RM4.8 bilion iaitu RM3.7 bilion bagi mengurus dan RM1.1 bilion bagi pembangunan.



Dengan senario dalam negara yang mencabar iaitu sumber air dan tanah terhad, persaingan untuk tenaga kerja dan corak cuaca tidak menentu, agensi kerajaan berkaitan memikul tugas besar untuk menjamin bekalan makanan cukup pada harga berpatutan kepada rakyat

Noh Omar

Menteri Pertanian dan Industri Asas Tani

INFO

Projek utama yang akan dilaksanakan pada 2012

- Pembinaan Besut Barrage RM20 juta.
- Empangan Paya Peda RM70 juta.
- Pembinaan Kolej Pertanian Malaysia, Bukit Tangga, Kedah RM40 juta.
- Pembinaan *Crops For The Future Research Centre* (CFFRC) di Semenyih, Selangor RM30.28 juta.

- Pembangunan padi di kawasan jelapang padi RM49.55 juta
- Pembiayaan TEKUN RM150 juta.
- Pengairan Imbuh Balik Sarawak dan Sabah masing-masing sebanyak RM10 juta.
- Zon Industri Akuakultur RM14 juta.
- Taman Kekal Pengeluaran Makanan (TKPM) RM4.45 juta.

Jumlah pengeluaran makanan mencatatkan peningkatan 2.7 peratus (8.42 juta tan) pada 2011 berbanding 8.21 juta tan pada 2010 membabitkan padi (2.7 juta tan), buah-buahan (1.7 juta tan), sayur-sayuran (947 ribu tan), daging ayam/itik (1.3 juta tan), daging lembu (48.8 ribu tan), perikanan tangkapan (1.4 juta tan) dan akuakultur (442 ribu tan).